



UPA16/142
13. maj 2016
Ane Hansen

Upernaakkut 2017-mi ataatsimiinnissamut ilaqutariit pissakinnerusut akunnattumillu aningaasarsiallit nammineerlutik illutaarsinnaanerit pillugu Naalackersuisut suliniuteqaqqullugit inatsisartut aalajangiiffigisassaattut siunnersuut.

(Inatsisartunut ilaasortaq Anthon Frederiksen, Partii Naleraq)

Ukiuni kingullerni pissakinnerit aningaasarsiakkaallu akornanni ikeq ajoraluartumik suli annertusiartorpoq, aamma taamatorluinnaq ippoq ineqarnermi atukkat tapiissutillu eqqarsaatigalugit. Ilaqutariit amerlasuutigut meerartallit inigisaminniit anisitaasartut amerliartorput, angerlarsimaffeqangitsullu amerliartorlutik.

Pisortat illuliornermut tapiissutigisartagaanni ukiumut 400 mio.-nit missaannittartuni taamallaat pissakinnerusunut 70 mio. missaaniittut ineqarnermut tapitut tapiissutigineqartarput. 300 mio.-nit sinnillit illuliorsinnaanermit inissialiortitsinissamuluunnit ilaatigut 20/20/60-mik taaneqartartunut tapiissutigineqartarlutik, taakkulu akissaatigissuinnarnut tapiissutaasartutut taaneqarsinnaaput. Allatut oqaatigalugu pissakinnernut inissiat 10.000-it missaaniittut boligstøtte-mut 70 mio. – missaat tapiissutigineqartarlutik inuillu 100-passuungitsunut 300 mio- sinnillit tapiissutigineqartarlutik. Inuit Ataqatigiit isumaqarpugut pisortat tapiissutigisartagaat naligiinnerusumik agguataarneqartariaqartut aammalu aningaasarsiakkaarujussuit namminerlutik aningaaserivinni atorlutik illuliorsinnaasut tapiissutinik isumalluuteqarnerat killiliivigisariaqartoq.

Taamaattumik Inatsisartunut ilaasortap Anthon Frederiksen-ip siunnersuutaa oqaloqatigiissutigissallugu soqutiginarujussuuvoq. Isumaqatigarpullu inoqutigiit pissakinnerit ullumikkumiit ajornannginerusumik namminerisamik illutaarsinnaanissaannut tapersersuineq pisortat tungaanniit annerusariaqarpoq.

Nutaamik eqqarsartoqartariaqalerpoq, nutaamik eqqarsarnermi attuumassuteqartut tamarmik suleqataanissaat Naalackersuisut kajumissaarutigisariaqarpaat, Namminersorlutik Oqartussat, Kommunit, aningaaseriviit, inissiatileqatigiiffiillu eqqarsaqatigiinnut ilaasariaqarput. Anguniartariaqarparput nunatsinni innuttaasut amerlanerpaat namminerisaminnik akisussaaffigisaminnik illuuteqalernissaat inissiateqalernissaalluunnit. Pisariaqassappallu nunat allat pissakittunut illuuteqalernissamik qanoq tapersersuisarnerat isumassarsiorfigineqartariaqarpoq.

Naalackersuisut siunnersuuteqartumut akissuteqarnerminni iliussissanik tikkuagaqarpallaaratik siunnersuummik itigartitsiinnarnerat pakatsinarpoq.

Naak taanna issanguaq politikkererpassuarnik qaaqqusilluni Upernavimmi immikkut ittumik ataatsimersuartitsinermi saviminermik atortulerluni illuliassatut nittarsaataq kikkut iluaqutissarsiffigisinnaavaat ? Pissakinnerit qanoq iluaqutissarsiffigisinnaavaat ? Naalackersuisut qanoq pissakinnerit namminerisaminnik illuuteqalersinnaanerit inissiateqalersinnaanerallu eqqarsaasersorfigaat.

Siorna ukiakkut Inatsisartut ataatsimiinneranni siunnersuuteqarpunga utoqqaat namminerisaminnik illullit illuminnik aserfallattaalinermit pisortanik tapiiffigineqarlutik illullit assigalugit aserfattallaaliinermut taperneqartalissasut, siunnersuut ilalernerqarpoq aamma Naalackersuisunik oqaatigineqarluni immikkut inatsisiliungikkaluarluni aningaasanut inatsit aqutigitigalugu atuutilersinneqarsinnaasooq, ungasinngittumi Ineqarnermut Naalackersuisup

tusagassiortunik katersortitsinermini nalunaarutigaa periarfissaq taanna atuutilersimasoq, taamatut nalunaaruteqarneq utoqqarnik namminneq illuutilinnik nuannaarutigineqaqaaq. Kisianni ulluni kingullerni utoqqarnik namminerisaminnik illulinnik arlalinnik saaffigineqarpunga periarfissaq taanna nuannarutigalugu qinnuteqarsimagaluarlutik ingerlaannartumilli itigartitaasimallutik periarfissaq taanna utoqqarnut namminerisamik illuutilinnut atuutingittutut nalunarfigineqarlutik. Ineqarnermut Naalakkersuisoq qanittukkut periarfissaalersimasoq taanna nalunaarutigisat qanoq paasisariaqarpa ? taperneqarnissamik sullissisut atuutingittutut nalunaarutigisimammassuk. Ineqarnermut Naalakkersuisup periarfissap taassuma atuutilernera pisortatigortumik nalunaarutigereeramiuk aamma isumagisariaqarpaa sinerissami sullissisut periarfissap taassuma atuutilerneranik nalunarfigissallugit.

Taamatut oqaaseqarluta siunnersuuteqartoq Anthon Frederiksen Parti Naleraq qutsavigarput pissakinnerit akunnattumillu isertilallit pillugit periarfissarsiusseqqusilluni siunnersuuteqarmat, siunnersuutaalu soqutiginarloq isumaqatigalugu Inatsisartut Sanartornermut ataatsimiisitaliani suliarineqaqqissasoq innersuussutigalugu.